

Deklaracija o saradnji parlamenata zemalja Jugoistočne Evrope

Parlamentarne delegacije zemalja Jugoistočne Evrope ujedinjene su oko zajedničkih civilizacijskih tekovina i zajedničke vjere u moralne i političke vrijednosti liberalne demokratije;

Dijeleći zajedničku viziju mirne JI Evrope u potpunosti integrirane u euroatlantsku zajednicu, odane demokratiji, vladavini prava i poštivanju ljudskih prava i osnovnih sloboda;

Prepoznajući historijska dostignuća u procesu euroatlantskih integracija koja nude mogućnost stvaranja nove Evrope u kojoj su prava svake nacije, svake etničke grupe, svakog građanina i svake vjere sigurna, garantirana i poštovana;

Priznajući zajednički interes u unapređenju saradnje sa svim zemljama JI Evrope i u razvijanju zajedničkih pristupa novim prijetnjama našem regionu i euroatlantskoj zajednici kojoj pripadamo;

Prepoznajući da će naš zajednički napor i sigurnost JI Evrope u cijelosti biti pojačan učešćem svih susjeda u regionalnim i multilateralnim institucijama;

Delegacije zemalja Jugoistočne Evrope prepoznaju važnost dijaloga i harmonizacije svog zakonodavstva sa standardima NATO-a, Evropske Unije i regionalnih foruma, kao što su Proces saradnje u Jugoistočnoj Evropi (SEECF), Vijeće za regionalnu saradnju (RCC), Inicijativa za saradnju Jugoistočne Evrope (SECI), Cetinjski parlamentarni forum, A-5, te drugi forumi, regionalni dijalozi i saradnje

Delegacije zemalja učesnica odlučne su da promoviraju bliske bilateralne i multilateralne političke i sigurnosne odnose među zemljama JI Evrope, kao i svojim susjedima, ubrzavajući time integracije u evropske i transatlantske institucije;

Delegacije zemalja učesnica osigurat će ključno tijelo za regionalni parlamentarni dijalog u oblasti sigurnosnih pitanja, kao što su: prekogranične prijetnje, korupcija, organizirani kriminal, terorizam, nezakonita trgovina, krijumčarenje (uključujući oružje, radioaktivne i ili nuklearne supstance), te druge forme transnacionalnog kriminala.

Delegacije zemalja učesnica ohrabrit će regionalne parlamente da revidiraju sadašnje zakone kojima se utvrđuje borba protiv prekograničnog kriminala, organiziranog kriminala, terorizma, nelegalne trgovine i drugih formi transnacionalnog kriminala i pozvat će nacionalne parlamente da donesu nove zakone, gdje je to potrebno, u skladu sa standardima EU.

Delegacije zemalja učesnica jačat će napore u svojim parlamentima da intenziviraju i ubrzaju reforme koje unapređuju demokratske institucije, vladavinu prava, civilnog društva, zaštitu i poštivanje ljudskih prava i građanskih sloboda svih pojedinaca, tržišnu ekonomiju, kako bi se jačala sigurnost, stabilnost i prosperitet u zemljama učesnicama, JI Evropi i šire.

Delegacije zemalja učesnica bit će odlučne da podrže i pozovu vlade zemalja JI Evrope da koordiniranim naporima intenziviraju borbu protiv korupcije, organiziranog kriminala, terorizma, nezakonite trgovine i krijumčarenja, kao i ostalih oblika transnacionalnog kriminala u skladu sa zahtjevima EU.

Delegacije zemalja učesnica afirmirat će odlučnost članova parlamenata za buduću transformaciju demokratskih institucija u njihovim zemljama obavljajući parlamentarni nadzor i podržavajući transparentnost i odgovornost.

Diskusije i debate zemalja učesnica dat će važan doprinos budućem razvoju prijateljskih odnosa i saradnje među parlamentima i zemljama JI Evrope. Podsticat će međusobno razumijevanje među parlamentarcima po pitanju ključnih sigurnosnih izazova s kojima se susreće JI Evropa.

Delegacije zemalja učesnica uspostaviti će zajedničke sigurnosne regionalne programe rada, donijeti neophodne dopune zakona i podstaći vlade da se zbliže u sigurnosnoj saradnji;

Delegacije zemalja učesnica intenzivirat će saradnju s drugim demokratskim evropskim institucijama i doprinositi transparentnosti procesa integracije ka EU i njihovih politika kako bi se osigurala informiranost i podrška javnosti.

U svim ovim sferama zajedničkog djelovanja, delegacije zemalja učesnica svečano potvrđuju da će se zalagati za bogato i dinamično transatlantsko partnerstvo u 21. stoljeću.

Delegacije zemalja učesnica tražit će od svojih parlamenata da razmatraju prijedlog Parlamenta Albanije da se uspostavi Parlamentarna skupština JI Evrope kao interparlamentarna organizacija, koja će promovirati bliske bilateralne i multilateralne političke i sigurnosne odnose među zemljama JI Evrope.

Tirana, 7. i 8. 12. 2009